



**Forum Competens Quæstionibus ex Universo Jure
selectis, atque ad praxin utilissimis illustratum, Seu
Tractatus Canonico-Civilis**

Friderich, Melchior

Ingolstadium, 1709

§. II. Utrum in loco Contractus ad dissolutionem agi possit?

[urn:nbn:de:hbz:466:1-61662](#)

sed pone, Castr. n. 6. ac aliij contra Fulgos. quod venditor, si dicto modo secutus est fidem emptoris advenae, eum in loco contractus convenire non possit, tametsi is postea ad eundem locum, nondum facta alibi solutione, revertatur: nisi, ut addit Castr. in cit. L. 19. §. 1. discedens emptor pergulam in loco contractus servasset. Idem porro tradunt de venditore respectu emptoris quoad obligationem tradendi & evictionem praestandi. Similiter maritus de dote conveniri non potest, ubi de ea convenit, vel dotale instrumentum confectum est; sed solum in loco sui domicilij. L. exigere dotem 65. ff. de Judic. & fusè ibi Petr. Barbol. Denique Legatus conveniri in loco contractus tempore legationis nequit super eo, quod ante legationem contractum est, sed jus habet revocandi domum. L. 2. §. 3. & 4. ac L. 8. ff. de Judic. Quæ leges quomodo conciliandæ sint cum L. eum qui 5. §. 1. ff. de constit. pecun. videatur Cujac. L. 13. obs. 17. & Petr. Barbol. in cit. L. 2. §. 3. à n. 141.

§. II.

*Utrum in loco Contractus ad ejus dissolutionem
agi possit.*

SUMMARIUM.

176. *Varie opiniones DD. proponuntur.*
177. *In loco contractus quirvis conqueri potest, sibi non esse numeratam pecuniam. Et agere ad rescissionem contractus (x. L. 2. C. de Rescind. vendit. Nec non de nullitate contractus. Et Redhibitoria vel Aestimatoria actione ex adulatio Edict. Imò etiam ad restitutionem in integrum.*
178. *Respondetur ad opposita.*
179. *Episcopus loci contractus relaxare juramentum potest, ut impugnari contractus valcat. Nec tamen rescindere contractum.*
180. *Ingens huc dissidium inter DD. est. Communis cum Bald.*

Bald. Dec. ac Jasone, teste Oliva p. 3. *de For. Eccl. q. 22. n. 8.* & Brunnem. *in L. 2. C. ubi* § apud quem affirmat, in loco solum domiciliij, & non etiam in loco contractū, ad hujus nullitatem, vel rescissionem agi posse. Forum competens agnoscent etiam in loco contractū Covarr. *L. 1. var. c. 4. n. 1.* Molin. *de Just. tr. 2. disp. 523. n. 23.* Gratiani *discept. for. c. 14. n. 22.* Coler. *de process. execut. p. 2. c. 1. n. 24.* § 44. Prænob. D. de Bassis *in 50. decis. Justin. decis. 4. n. 6.* post Bart. Butr. Felin. ac alios, quos allegat Oliva *l. c.* Distinguunt Petr. Barbos. *ad L. 19. §. proinde. ff. de Judic. à n. 24.* & Oliva *l. c. à n. 9.* & in loco solum domiciliij rescissionem petendam affirmant, si contractus ex utraque parte fuit perfectus, v. g. si pupillus læsus in contractu cum auctoritate tutoris inito, aut Ecclesia in venditione bonorum cum solemnitatibus facta, restitutionem in integrum petant: agi vero etiam in loco contractū posse, si contractus ex utraque parte perfectus non fuit, v. g. si pecunia numerata non fuit, aut contractus ex aliquo capite fuit nullus, & de nullitate agitur. Sed & leges hic antinomiam continere videri possunt: nam *cit. L. 2. C. ubi* § apud quem dicitur, pro restitutione in integrum adeundum esse *provinciae præsidem, in qua domicilium habent, quos convenis:* quo textu nituntur primæ opinionis DD. E contrario *L. in contractibus 14. §. ult. C. de non num. pecun. statuitur,* posse quemvis in loco contractū apud ejus Judicem conqueri intra biennium, sibi non fuisse numeratam pecuniā: quā decisione se munit secunda opinio.

177. Ut ista rite deciduntur, inter varios casus distinguendum est. Et in primis ex *cit. L. 14.* certum est, in loco contractū conqueri quemvis posse ob non numeratam pecuniā. Ratio est: quia ibi, ubi convenit, pecuniā esse solvendam, quasi contrahitur ad reddendam syngrapham pecuniā non numeratā, & hac ratione eodem loco, ubi obligatio ad implendum nata est, peculiaris quoque & propria ad resolutionem ejusdem negotij obligatio nascitur. Certum est 2. ex recepta doctrina Bart. *in L. 1. de SS. Trin. n. 20.* agi in loco contractū posse ex *L. 2. C. de rescind.*

S 3

vend.

vend. si quis in venditione læsus sit ultra dimidium justi pretij: eò quod ex hac lege non absolutè agitur ad rescissionem contractus, sed disjunctivè ad rescissionem vel supplendum pretium: & quoad forum respicitur contractus, eaque, que in ipso interveniunt: at læsio intervenit in ipso contractu. Certum esse videtur 3. posse in loco contractus de nullitate contractus agi, v. g. si usuraria pravitas intervenit, ut ait Brunnem. ad cit. L. 14. n. 18. aut si invalidus fuit ob defectum solemnitatis, dolum quoad substantiam &c. tum quod eadem est natura distractus & contractus arg. L. Pomponius 13. §. 2. ff. de adquir. vel am. poss. L. Exempto 11. §. 5. § 6. ff. de act. empt. tum quod ad Judicem loci contractus pertinet cognoscere de valore contractus, cum non possit compellere ad ejusdem implementum, nisi prius constet de ejus valore. Consequens ex modo dictis & certum est 4. ex Aedilitio edicto agi posse redhibitoria actione ad rescissionem contractus in loco contractus: quia Judicis, in cuius territorio contractus est initus, est cognoscere, utrum ob vitium rei in contractum deducatur redhibitoria, vel estimatoria seu quanto minoris competit. Igitur duntaxat dubium est de remedio extraordinario restitutioonis in integrum. Et hoc quoque nobili officio Judicis loci contractus expediri posse ex dictis consequens esse mihi videtur. Nam si coram hoc Judice agi potest ex L. 2. C. de rescind. vend. non apparent ratio, cur non etiam ejusdem officium ad restitucionem in integrum implorari possit: tum quod læsio, ob quam petitur restitutio, in contractu æquè intervenit, ac læsio ultra dimidium, ob quam ex cit. L. 2. agitur, & nullum inter unum ac alterum casum differentia est, quam quod major læsio necessaria est ad agendum ex cit. L. 2. quam quando petitur restitutio in integrum, & nonnunquam etiam per restitucionem in integrum non petitur rescissio contractus, sed solum supplementum pretij: tum quod in contractu tacita semper obligatio & quasi promissio intervenisse censenda est ad ea præstanda & resarcienda, quae alterum alteri debere & præstanda esse æquius Prætor arbitratus

tatus fuerit; ac idcirco dum agitur ad restitutionem, ex ipso contractu agitur: tum denique, quod in loco contractū melior notitia ordinariē habetur de lāsione facta & causā restituendi, quām alibi. Quam ob causam constitutum est *L. 2. C. ubi ratiōcīn.* ut qui administrationem gessit, in loco, ubi negotium & administrationem gessit, conveniri possit.

178. Neque obstat, quā adversarij nituntur, *cit. Lex 2. C. ubi & apud quem cognit.* sic enim illa inquit: *consequens est*, si de his (qua ex transactione tradidisti) *repetendis per in integrum restitutionem vel quamcunque aliam causam putaveris agendum*, ejus *adire te provinciae præsidem, in qua domicilium habent*, quos *convenis*. ubi sub tō *adire* non necessariō intelligendum est *debere*, sed intelligi potest *posse*, non excluso videlicet Judice contractū. Deinde tametsi lex diceret, domiciliū Judicem adiri debere, hoc tamen solū de eo casu intelligendum foret, quo reis in loco contractū non invenitur, uti præter alios explicat Covarr. *l. c.* Nec valet, quod illi hīc dicunt, hac ratione nihil speciale illā lege statui, cū aliunde manifestum sit, debitorem in loco contractū conveniri non posse, nisi ibi inveniatur: nam negatur suppositum, quod Impp. ibi speciale quid statuere debuerint vel voluerint, notūmque est sāpe unā lege repeti, quod aliis jam decisum, vel ipso etiam naturā lumine clarum est. Demum cū dīcatur ibidem *vel quamcunque aliam causam*, sequeretur juxta adversarios, non tantū propter restitutionem in integrum, sed etiam ob pecuniam non numeratam, rescissionem ex *L. 2. C. de rescin. vend.* nullitatē contractū &c. adiri necessariō debere Judicem domiciliū: quod falsum esse ex dictis constat.

179. Ex dictis consequens est I. quod cum Felin. Dec. Rom. Lap. ac alijs tradit Covarr. *l. c.* posse Episcopum loci, in quo contractus initus est, etiam cum extraneo, in juramento, quod contractui adjectum est, dispensare eum in finem, ut contractus impugnari & rescissio peti possit. Undenon apparet, quo jure Caldas *L. si curatorem 3. C. de in integr. rest. n. 31. dicat, caven-*
dum

dum esse ab hac Romani & Lapi doctrina, cùm tamen ipse *l. c. n. 30.* tradat, in loco contractus restitutionem in integrum peti posse: nec enim ratio reddi potest, cur Judex loci contractus hanc restitutionem facere valeat, & non etiam Episcopus ejusdem loci juramentum ad eum finem relaxare: ideo enim Judex contractus restituere in integrum potest, quia potest ad contractum observandum compellere; atqui hoc ipsum potest Episcopus per censuras, si opus fuerit. Quin tradunt Felin. Alex. Jas. Bald. & Castr. apud Oliva *cit. q. 22. n. 12.* posse coram Episcopo, qui absolutionem à juramento dedit, agi ad ipsam rescissionem contractus jurati etiam inter laicos initi: eò quòd Judex præparatorijs sit etiam Judex causæ præparatae. *L. Ordmarij 13. C. de rei vind.* Verùm hanc doctrinam non immeritò rejicit Covarr. *l. c. n. 8.* & ipsa praxis: nam absolutio à juramento, quæ purè dependet à potestate spirituali, absolventi non tribuit jurisdictionem ad cognoscendum de re purè temporali inter laicos. Neque simpliciter & absolutè verum est, Judicem causæ præparantis esse Judicem etiam causæ præparatae: ut probat *Lex 1. C. ad exhibend.* Neque contrarium asseritur *cit. L. 13. C. de R. V.* nam in casu hujus legis Judex causæ præparatoriæ erat simul Judex competens ad causam præparatam, ut notat Covarr. *l. c.* Consequens est 2. quòd quis repetere possit indebitum, ubi illud solvit, tametsi non sit forum rei. *L. qui loco 27. ff. de condic. indeb.* & ibi Gloss. Costald. in *L. 19. §. si quis. ff. de Judic.* Matth. Steph. *L. 1. de Jurisd. c. 29. n. 29.*

§. III.

*An debitor in loco Contractus conveniri pos-
sit, si ibi non reperiatur.*

SUMMARIUM.

180. *Nemo in loco contractus conveniri potest, nisi ibi reperiatur.*
 181. *Nisi sit simul locus domicilij.*